

Нюор

КЪМАССР-и ЖАЗЫЧУЛАРЫНЫ СОЮЗУНУ
БЛА ВЛКСМ-и ОБЛАСТЬ КОМИТЕТИНИ ЖУРНАЛЫ

ISSN 0207—6543



1988



Ахмат СОЗАЕВ

МАЙ КЕЛГЕНДИ ТАУЛАГЪА

Май келгенди таулагъа,
Табийгъат да къууана.
Байрамгъа хазырлана,
Хычин этеди анам.

Мамыр арбаз жарыкъды,
Балли терек чагъады.
Аппа, туудугъун алып,
Кенг орамгъа чыгъады.

Кёк да бир бек чууакъды,
Кёреме — майны бети,—
Къайынчыкъча субайды,
Халкъны да ариу этип,

Къызыл байракъ тепсейди,
Майны кюнюне жырлай.
Жашасынла, дейбиз биз,
Мамырлыкъ, Урунуу, Май!



Сур. А. Жилонуду

КЪАРА КЪОЗУЧУКЪ



Хасан, шкодан жай солуулагъа чыкыгъанлай, тау жайлыкыгъа атланды. Атасы колхозда кьойчу болуп ишлейди. Жашчыкъ атасы бла бирге сюрюу кютерге бек сюеди. Ингир сайын, малла кьош тийресине келген кезнуде, сюрюуню аллына ётюп, атасыны эски жамычысын жашил кырдыкга жаяды. Анга жатып, кьойла, кырдыкны «шырт-шырт» этдире, кьалай отлагъанларына сюйюп тынгылаучуду. Ингирде не кеч да жатсын, эрттенликде эртте турмай амалы жокъду. Тау этекледе салкын хауа, шаудан суула да аны санларына жангы кьарыу бергенча кёрюнедиле.

Кьойланы, кьозуланы жашил кырдыклы бетге жайып, кеси уа бийигирек дуппурда олтуруп, ол китап да кёп окъуйду. Алай «Повесть о настоящем человеке» деген китапны барындан да бек жаратады. Ол кеси окъугъан китаплада жигитлеге ушаргъа, алача таукел, батыр болургъа сюеди. «Ким биледи, тюберге тюшсе, сермеп, бёрюню кьулакъларындан тутуп кьояр эдим», — деген умуту да барды. Кьозулагъа тузчукъ не да бир татымлы аш бере туруп, Хасан жыр да айтады. Булбул ауазыча, ариу-ариу сызгыра да биледи.

Аны жырлагъанына бла сызгыргъанына кьозула, бара-бара, юйренип кьалгъанча кёрюнедиле. Ол жырлай не да сызгыра башлагъанлай, ала, чабып келип, аны тегерегине жыйылып кьалдыла. Бир бирде уа жашчыкъ, хуржунундан балтуз, кампет не да гыржын

чыгъарып, кьозулагъа кьапдырады. Ала уа, татлыкъсынып, кёзлерин жылтыратып, «Энтда да бармыды?» дегенча, Хасан кьайры барса, ары барып, ызындан айланып турадыла. Берир заты кьалмаса уа: «Болду! Барыгъыз, отлагъыз энди. Ма, кьарагъыз, жугъум да жокъду!» — деп, хуржунларын ол чюйре айландырып да кёргюзтюучюдю кьозулагъа. Алай кьозула аны не айтханын кьайдан билсинле? Ала кёпге дери чомарт, халал шуёхларыны кьа-тыннан кетмей турадыла. Кьалай эсе да Хасан да, кьозула да бир бирге юйренчек болуп кьалгъандыла.

Бир кюн а, кьозуланы да тёшге жайып, Хасан китап окъуй тургъанлай, индекде бир кьозу ачы-ачы макъырды. Ол чабып барса — суусаргъа, тюлкюге деп салынган кьапханнга кьара кёпке кьозучукъ тюшюп тура эди. Хасан алгъа не этерге билмей кьалды. Кьозучукъгъа асыры жаны ауругъандан, жиярыгъы окъуна келди. Сора, эки кьолу бла да кьапханны жиясын керип, кьозучукъну арт аягъын кьапхандан чыгъарды. Алай, кьозучукъ, аягъы юсюне сюелалмай, аууп кьалды. Ол заманда жашчыкъ бютюн да бек жарсыды. Кьалай эсе да кёз жашлары кеслери алларына келип кьалдыла. «Кьапханны узагъыракъ жерге салмай, кьош тийресине салгъан неге ушайды?» — деп, ичинден мараучу Османнга ачыуланды. Ызы бла, ариу айта, жапсара, кьозучукъну башын сылады. Сора, терк окъуна кьойнуна алып, мал дохтургъа элтди. Нек эсе да Хасанны атасы да ары барып тура эди.

— Кьара сен бу харипчикге! Аякчыгъы эзилип турады да, — деди дохтур, кьозучукъгъа тийип кёрюп.

— Ёлюпмю кьаллыкъды? Энди, алгъынча анасыны ызындан чабаллыкъ туююлмюдю? — деди жашчыкъ.

— Иги бакъсакъ, ким биледи, сау этерге да болурбуз, жигит, — деди дохтур, Хасанны башын сылай.

Жашчыкъны бети жарыды. Дохтур а, кьозуну сынган аякчыгъын шош-шош сылап, тюзетип, жукъа кьанга-чыкъла салып, тап байлады.

Андан сора, дохтургъа да кѣргюзте, Хасан къара къозучугъуна багъып турду. Тауну бийигине чыгып, андан татымлы, ариу кырдык келтирди. Ариу шаудан суу да ичирди. Кюнлени биринде уа бурма къозучукъ, аз-аз сынчыклай, атлап башлады.

— Жашым, сен жыртып ашатхандан эсе, кеси отласа игиди. Арлакъ, берлакъ элт. Кырдыкны ариууна, — деп эсгертди атасы Хасаннга.

Бир-эки кюнден а — жашчыкъ къайры барса, къара къозу да ары барып башлады. Атха минип, Хасан бир жары тебиресе, кютю къозучукъ бир да суймей эди. «Мени къоюп кетме!» дегенча, макъырып, ызындан чаба эди.

Заман да бара, къозучукъ сюрюуге

тартдырып, ана жылыуун излеп башлады. Сора аны бир эрттенликде сюрюуге къошдула. Ол, чабып барып, уллу сюрюуде анасын терк окъуна табып къойгъаны сейир эди. «Мени суйген этгенликге, анасын а унутмагъанды», — деди Хасан ичинден. Ингирде уа, сюрюу ыстауатха жыйылгъанлай, къозучукъ Хасанны къатына чабып келди. Келди да, тузчукъ жалаучусуча, аны къол аязын жалады.

— Ата, къарачы! — деп къууанды Хасан. — Къара кѣрпе къозучугъум, манга тансыкъ болуп, чабып келгенди.

— Аперим, жашым, аперим! Сен сау этгенсе аны. Аягъы сынган къозу былай терк тирилип къалыр деп кимни эсинде бар эди! — деди атасы.



Гур. А. Кузевниги

Исса БОТАШЕВ
МАКЪА КЪАЙДА
ЖАШАЙДЫ?



Ташланы да къыздыра,
Кюн бек кызыу болганды.
Кёл бойну уа жуунган
Жашчыкъладан толганды.

Бир сакъ жауун жетди да,—
Ашыкъ-бушукъ кийине,
«Кет, жибип къалабыз!» — деп,
Хар ким къачды юйюне.

Макъа да сакъ жауундан
Бек къоркъгъанга ушайды:
Ол ташаяды кёлге.
Макъа къайда жашайды?

Аны да юйю болур
Быллай терен кёлледе,
Ол ары бугъа болур
Жауун жаугъан кюнледе.

ДМИТРО ДЕРЕЧ,
украинлы жазыучу.

„ТИЛБАРАКЪ“

Степан бла Ляля классда бирге олтура эдиле — терезе жанындан санап, ючюнчю тизгинде. Ала бир заманда да сёз болмаучу эдиле. Анда-санда даулашыргъа тюшген эсе да, кёлкъалдылары узакъгъа созулмагъанды. Классда алай юлгюлю, жарашыулу олтургъанлары ючюн устаз Зинаида Игнатьевна аланы махтагъан окъуна этгенди. Кертиди, ол «жарашыулукъну» юсюнден Степан бир тюрлю, Ляля да башха тюрлю айта эдиле.

— Бирге олтура эсек, биз шуёхла болургъа керекбиз,— деди бирде Ляля, кёзлерин кысаракъ этип, хар сёз айтханы сайын шонтукъ бурунчугъун тарта.— Сен манга чот, эсеп чыгъарыргъа болушургъа керексе. Мен а, назмуланы кёлюнгден айталмай, жангылып

къалсанг, сен эшитирча шыбырдап, са-нга болуша турурма. Анга ыразымыса?

Алай айтып, Ляля биягъы шонтукъ бурунчугъун жыйырды. Ол алай этсе, аны бурнунда, бетинде сепгилчиклери бютюн ачыкъ кёрюне эдиле. Степан а баш тёбен къарап тохтай эди.

— Мен айтханнга ыразымыса? — деп жангыдан сорду кызычыкъ.

Степан биягъы баш тёбен къарады. Жашчыкъны къалын, зыбыр чачы мангылайын окъуна жаба эди. Аны ючюн анга «кирпичик» дей эдиле бир бирде.

— Мен сени бла шуёх боллукъ туююлме, быллай жаншакъ кыыз бла,— деди Степан.— Кереклисича оюм этерге кёймайса. Ангыладынгмы? Назму айта туруп жангылсам да, манга болушургъа кюрешме. «Биреу айтханны къатлап, иги окъугъанлагъа тенг болаллыкъ туююлсе», — дегенди атам. Мен а бек иги окъургъа сюеме.

Лялячыкъ, башын бир тюрлю булгъай, аны кёзутурча айтды:

— Махтанчакъса сен, Степанчыкъ!



Алай айтханы ючюн жашчык аны эшмечиклеринден тартды. Дагыда тартырык эди, алай тюз да ол кезиуде Зинаида Игнатьевна классха кирди.

— Сабийле, бусагъат мен кяангагъа эсеп жазарыкма,— деди ол.— Сиз а бир биригиз бла эришген этериксиз. Аны ким алгъа чыгъарып бошарын кёрейик.

Лялячык терк окъуна жууашчык болуп къалды. Степанга бир-эки кере ышаргъан да этди.

— Сен манга болушурукмуса? — деди сора.

Жашчык тынгылауну ийди.

— Болмай эсе да, биринчи сорууну жууабын тюз жазаргъа болушурса да? Къалгъанын а кесим этерме,— деп, бютюн жууаш тиледи кызычык.

Степан, къашларын туююп, биягъы баш тёбен къарады.

Эсеп кыйын туююл эди. Аны къалай чыгъарыргъа керегин Степан олсагъат ангылады.

«Эки мешина бла тюкеннге жетмиш эки ящик алма келтиргендиле. Жюк ташыучу уллу мешинада ящикле гитче мешинада ящикледен юч кере кёп эдиле. Хар мешинада ненчашар ящик келтиргендиле?»

Степан эсепни кимден да алгъа чыгъарып бошаргъа бек сюе эди. Алай Лялячык бир тохтамады, тынмады.

— Къалай башлайым? Бир кесекчик окъуна болуш,— деп, шыбырдай-шыбырдай, аны бездирди.

Жашчык тынгылауну ийгенлей турду. Сора Лялячык да ахырда шош болду. Жалан да жашчыкны тефтерине терк-терк къарап, анда кёргенин энчи къагъытчыкгъа жазып башлады.

— Къарама бери! — деди жашчык.

Ол алай айтханлыкгъа, кызычык бурунчугъун окъуна жыйырмады.

— Мен санга айтама: къарама бери! — деп, хыны ауаз бла къайтарып айтды жашчык.

Алай бу жол да аны айтханы Ляляны кызаргъан къулакларыны жанлары бла ётюп кетди. Сора жашчык къолун кётюрдю.

— Не болганды, Степан? — деп сорду устаз.

— Тефтериме къарап, мен жазгъанын жазып барады бу, Зинаида Игнатьевна,— деди жашчык тарыкгъан ауаз бла.

Устаз экисине да тюрслеп къарады. Ыразы болмагъанын билдире, жашчыкны ол кесини столуна чакъырды.

— Ма былайда, мени аллымда олтур, — деди.

Энди Степан сау классха туурада олтура эди. Жыйырмадан аслам кез кырай эди анга — бирле ичлеринден айып этип, бирле уа — не болганын игирек билирге суююп.

Бу аз даулашчык чырмады да, Степан эсепни терк чыгарып бошамады. Кеси умут этгенча, биринчи болалмады. Ючюнчю болду. Зинаида Игнатьевна биринчиле бла бирге аны да махтады. Алай Степан анга хазна кыуаналмады. Бары да Ляляны хатасындан!

Степан школдан юйге келе турганлай, Ляля бла хоншусу Наташа аны ызындан жетдиле. Саулай орамга эшитдирип, экиси да бирча кычырдыла:

— Тил-ба-ракъ! Тил-ба-ракъ!..

Степанга алай бир заманда киши да айтмаган эди. Анга хычыуун кёрюмеди. Бютюн да Наташаны кычырганы ачыу тийди. Наташаны суюген эте эди ол. Классда бек иги спортсмен болганы ючюн, узун, жумушак эшмелери ючюн да сую эди. Ляляны эшмелери уа — бош, киштик кыурукла кирик. Кысхасы, Наташа бирсиледен кыалай эсе да башхаракъ эди...

Степанны бир кыайгысы болганын анасы терк окъуна билеп кыйду.

— Нексе былай? Не жарсыуунг барды, балам? — деди.

Степан хар затны болушунлай айтды. Жашырмай, хар нени да ачык айта турургъа ол анасы бла былтыр, биринчи классда окъуган заманында окъуна келишген эди.

— Зинаида Игнатьевна кесини столуна Ляляны угъай, сени нек олтуртханыны юсюнден а сагыш этгенмисе? — деди анасы Степанга. — Ол сени терсге санаганды.

Жашчык, мангылайын жыйырып, сагышланды.

— Ляля мен жазганны жазып барганы ючюн билемисе, Зинаида Игнатьевна экибизге да «экиле» салып кыорык эди. Алай этерикме деп, ол эртте айтханды бизге. Сен а мен «эки» алсаммы сую эдинг?

Степанны анасы ышарды.




Сур. Г. Мельничниги

— Угъай, балам, — деди ол. — Мен санга аман болурун суюмейме. Алай, бир башха жерге олтурайым деп, кесинг тилесенг иги эди.

Степанчык, тёзалмай, жияп ийди. Ол тилбаракъ туююлду. Ол кыалай этерге билмегенди. Энди уа Лялячыкдан кечгинлик тилерге окъуна хазырды. Тамбла, бирси кюн угъай, артдаракда кечгинлик тилерикди. Уллулагъа игиди: ала кеслерин кыалай жюрютюрге, не заманда кыалай этерге керегин да уста биледиле. Огъурлу, тюзлюкю бола да биледиле. Степан а ол затланы алыкъа иги билмейди. Сора аны не терслиги барды?

М. МОКАЕВ кёчюргенди.



Шахмурзаев Алексей Къабарты-Малкъарны Сыйлы артистиди. Ол республикабызны драма театрында ишлегенли иги кесек заман болады.

Сахнада, тюрлю-тюрлю ролляда ойнай, ол кесин битеу да халкъыбызгъа сыйдюргенди. Аны жарыкъ искусствосуна Къарачайда, Дагъыстанда, Къазахстанда, дагъында кеп башха жерледе адамла къызыу къарсла уруп тюбегендиле.

Алай махтаулу артистибизни дыгъында бир сыйген иши барды. Ол айтхылыкъ суратчыды. Алексей ишлеген фото-суратла кеп тюрлю кермючледе болгъандыла. Алагъа Москвада да бийик багъа бичгендиле. Таулу жашны бу ишде да уллу факмусу болгъанына сейир этгендиле.

Шахмурзаев Алексейни суратларында биз Туугъан журтубузну адамларын, аны бийик тауларын, ариу чучхурларын керемиз.

Бу суратла, жалан да фотола болуп къалмай, чынтты суратлау чыгъармаладыла дерге боллукъду.

Бютюн да бек Алексей сабийлени суратларын, аланы окъууларын-дан, жашауларындан хапар берген суратланы ишлерге сыйкучюдо.


"Нюрню" бу бетинде сиз аллай суратланы кересиз.



БУ НЕДИ?

Бу затланы атларындан,
тауушлары ушагъан сёзлени
табып, оюн „назмучукъла“
этигиз.

Юлгю: — Бу неди?
— Чана.
— Бу неди?
— Чага...



ТЕМА С. ГЛАШЕВНИДИ
СУР. М. ТАТРОКОВНИ
БУЧУ



Нальчикде пионерле Двореци. Школлада иги окъугъан жашчыкъла, къызчыкъла мында кѣп иш тындырадыла. Кѣп затха юйренедиле. Сѣз ючюн, аскер-спорт усталыкъгъа. Жырларгъа, тепсерге, тутушургъа. Бирле тюрлю-тюрлю гюлле ёсдюредиле. Бирле сурат этедиле. Бирле уа шахмат, футбол, волейбол ойнайдыла...

Бу ариу, бу жарыкъ мекамгъа жүрюген школчула 400-ден аслам жыйыннга юлешинедиле. Хар ким кеси сайлагъан жыйыннга къошулады. Сабийле бек суйген, 30 жыйындан къуралгъан, бек уллу бѣлюмледен бирине уа жолоучула-туристле бѣлюмю саналады.

Жаш жолоучула кѣп жерге баргъандыла. Таулагъа, къаялагъа чыкъгъандыла. Чегем тарына жол тутуп, Тихтенген этегине дер жетгендиле. Холам-Бызынгы тарында Бызынгыны бир заманда да эримеген, айтхылыкъ буз тауларына къарагъандыла. Тюрлю-тюрлю дорбунлагъа, къая тешиклеге кирип, къууанып, сейирсинип айлангандыла. Минги тау тийресине уа азмы баргъандыла! Черек аузунда кѣк кѣлле да, ёмюрде унутулмазча, аланы кѣз туураларында къалгъандыла.

Ыйых кюн сайын жаш туристле жангы жолоучулукъгъа чыгъадыла. Школдан бош заманларында, узакъ жерлеге барып, бир кюн, эки кюн не да сау ыйыкъ айланып келедиле. Аллай жолоучулукъда ала кеслерини санларын чыныкъдырадыла. Гитчеликден

окъуна гиртчиле, жигитле болургъа юйренедиле.

Турист пионерлеге кеслерини ишлерин иги билген таматала башчылыкъ этедиле. Гумаев Борис Мажитович спортну устасына кандидатды. Гаврилов Вячеслав Дмитриевич а спортну устасыды.

Харенко Сергей Александрович таматалыкъ этген пионерле Тонгуз орун ауушу бла тау артына да аугъандыла. Анда къаяланы, сууланы, элени, жерлени кѣрюп къайтхандыла. Ауушха жетте баргъан жерде жютюкѣз жашчыкъла Уллу Ата журт урушну кезнуонде ёлген солдатланы къабырларын тапхандыла. Сора ала, жай солууну заманында заводланы биринде ишлеп, ахча алгъандыла. Ол ахчагъа сын таш ишлетип, белгисиз солдат къабырлагъа салгъандыла.

Мындан алда уа жаш туристле бары да Владимир Ильич Ленин туугъан кюнню намысына Акъ къаягъа чыкъгъандыла. Бусагъатда Хорлам кюнню намысына аталгъан жолоучулукъгъа хазырлана турадыла. Аякъ машинала бла Нальчикден Прохладна шахаргъа барып къайтырыкъдыла.

Бююнлюкде 200-ге жууукъ жашчыкъ бла къызчыкъ «СССР-ни жаш туристи», «СССР-ни туристи» деген значоклагъа тийишли болгъандыла. Дудуев Заур, Авхачов Сергей, Романенко Андрей, Дженчерадзе Зурап жаш туристлени инструкторларыдыла...

Пионерле Дворецинде туристле бѣлюмюню таматасы — Ткаченко Галина Вячеславовна «Нюрню» окъуучуларына былай айтады:

— Багъалы жашчыкъла, къызчыкъла! Асламыгъыз элдеде жашайсыз. Алайды да, шахарда пионерледен эсе, таулагъа сиз жууукъсуз. Таулагъа, къаялагъа чыгъамысыз? Республикабызда жер-жерлеге барамысыз? Туугъан жеригизни ташын, агъачын да, жолларын, къолларын да иги билирге, таныргъа керексиз. Туристле жолу — жигитле жолу болгъанын унутмагъыз!

«Нюр» журналны корреспонденти.

ЁРЮЗМЕКНИ САБИЙ ЗАМАНЫ

Ёрюзмек сабий заманында бек терк ёсюп, айнып барганды. Ол бирси сабийледен — тенглеринден иги да бойлу кёрюнгенди. Тюрлю-тюрлю оюнлада тенглерине башчылык этгенди.

— Машалла, машалла! Ёрюзмек къалай тулпар, къалай акъыллы сабийди! Ма къарап туругъуз, бу бир айтхылыкъ, бир ахырлыкъ нарт болмаса,— дегендиле къартла.

Нартланы тирилик, жигитлик, эслик да керек болгъан оюнлары кёп эдиле. Жортууулгъа бармагъан кезулеринде нартла ол оюнланы ойнагъандыла. Ойнаргъа жашланы да юйрете тургъандыла. Алай этиу аланы эрттеден келе келген тёрелери эди. Заман бара, тутушууда, чабышыуда, къол таш атыуда, чариште, къылыч ойнатыуда да Ёрюзмекни аллына ёталгъан болмай башлагъанды. Ёрюзмек бек намыслы, бек халал, оюнчу-кюлкючу жаш эди. Ол келмей къалгъан кюн бирси жашла адамны кёлюне жетерча оюн хазна къураялмагъандыла.

Бир бири ызындан бир-эки жолда Ёрюзмек ойнаргъа келмей къалгъанды. Ол ауругъан этген сунуп, жаш тенглери аны кёре баргъандыла.

— Ёрюзмек, ойнаргъа нек келмейсе? Ауругъанынгмы барды? — дегендиле жашла.

— Угъай, ауругъаным барды деп да билмейме. Алай нек эсе да ойнаргъа кёлюм бармайды,— деп, учхара жууап бергенди Ёрюзмек.

Тынгылы жууап алалмай, жашла юйлерине кетгендиле. Бир кюн а жашладан бири нёгерлерине кёлюндегин айтханды.

— Мен ангылагъаннга кёре, Ёрюзмек аурумай эсе да, аны жюрегинде бир жарсыуу барды,— дегенди.— Алай болмаса, жарык кёллю, ариу адепли, биз барыбыз да суюген Ёрюзмек ойнаргъа чыкъмай къаллыкъ туюул эди.



Жюрек жарсыуун ол бизге айтыргъа керекди. Келигиз, жашла, энтда Ёрюзмекге барайыкъ. Не жарсыуу болгъанын бизге айтсын.

Жашла, жыйылып, Ёрюзмекге келгендиле.

— Ауругъанынг жокъ эсе, былай юйге кирип нек тураса? — деп, тюзюн билирге суюгендиле.

— Шуёхларым,— дегенди Ёрюзмек,— мени бир затым да аурумайды. Кийик саулугъум барды. Сосурукъну оюнларын ойнар къарыуум да барды. Алай, кёресиз, тейрибизге беребиз деп, жыл сайын нартла кына сакъаллы Къызыл Фукга жасакъ берип турадыла. Къоркъмасала, ала анга жасакъ бермез эдиле. Биз а, хайт деген жашла, ол артыкълыккы кёре тургъанлай, кеси кесибижни жубата айланабыз. Мен анга жарсыйма, андан мудах болуп турама. Къалай этейик да, неден башлайыкъ? Халкыбызны зарауатлыкъдан къалай къутхарайыкъ?

— Мени акъылыма кёре,— деп, сёзге кёшулгъанды жашладан бири,— сен кесинги жарсыуунгу, не оюм этгенинги бек алгъа атанга, ананга айтыргъа керексе. Ызы бла уа жамауатха билдирмей жарамаз. «Сорулгъан иш сёгюлмез»,— дейдиле. Тамата нартла тюз оноу этерле.

Тенглери кетгенлей, Ёрюзмек кесини жарсыуун, не мурат этгенин да атасы Усхуртукга айтханды.



— Къой, балам, къой! — дегенди Усхуртук. — Къолунгдан келмезлик зат бла кюрешме. Ол сени муратынгы сезсе, жангыз сени угъай, барыбызны да уллу къыйынлыклагъа къалдырыр. Къызыл Фук, балам, нартла тейрисиди. Халкъгъа игилик этеме деп, бир уллу палах салып къойма. Санга дери да нартлада тулпарла, жигитле бола келгендиле, алай Къызыл Фук бла демлеширге киши да базынмагъанды. Не этериксе? Тейри берген къыйынлыкъны бизни аталарыбызны аталары да кётюре келгендиле. Кётюрмей, бизни да амалыбыз жокъду. Къадарыбыз алайды.

Усхуртук бла жашыны ушакъларын эшитип, Ерюзмекни анасы эшикден кирип келгенди.

— Жашым, жаным, атанг айтханы эт. Эшигибизни жапма, — деп тилегенди.

Ерюзмек, атасыны бла анасыны кёллерин жапсара, ариу сёлешгенди.

— Атам, анам, — дегенди ол, — мен сизни жаныгъызны бир заманда да къыйнамагъанма. Сиз сау болсагъыз, манга андан сора бир зат да керек туююлдо. Энтда сизни къыйнаргъа, инжитирге суймейме, алай, этген муратыма жетгинчи, тынчлыкъ табарыкъ туююлме. Тенглериме да айтханма.

— Нартлагъа, жамауатха уа айтханмыса? — дегенди Усхуртук, жашыны тохтамазын кёрюп. — Айтмагъан эсенг, айт. Ала тюз оноу этерле. Нартлада жюрюй келген төре алайды.

Экинчи кюн Ерюзмек ныгъышха баргъанды. Къарт нартла бла саламлашханды. Сора алагъа кесини муратын билдиргенди. Кёпню кёрген, кёпню билген къартла анга былай айтхандыла:

— Санга дери да нартлада айтхылыкъ жигитле бола келгендиле, алай къына сакъаллы Къызыл Фук бла демлеширге базынган а чыкъмагъанды. Къызыл Фук бизни тейрибизди. Сени муратынгы ол сезсе, барыбызны да эшек отун этип къояр. Къой, ахшы улан, къой! Игилик этеме деп, башыбызгъа къан жаудурма.

Ерюзмек юйге мудах къайтханды. Нартланы айтханларын атасына айтханды.

— Къарайма да, жашым, сен тохтарыкъ туююлсе, — дегенди сора Усхуртук. — Алай эсе, жер юйге тюш. Анда къолан алаша тагъылып турады. Анда къара кюбюр да болур. Аны ач да, темир айыллары бла ат жерни алып, къолан алашагъа сал. Ызы бла уа, сауутсаба болгъан отоугъа кир да, мени сырпын къылычымы ал. Эмегенле бла ахыр кере сермешгенибизли бери ол сырпын биленмегенди. Билеген эт.

Ерюзмек, атасы айтханча этип, къара къынлы сырпынны алгъанды да, жагъада хырпин ташха баргъанды. Алайда атасыны къылычын билей тургъанлай, узакъдан жолну букъу этдирип келгенлени кёргенди. Нарт эллени биринде жашагъанла тул-туман болуп келе эдиле. Ким ёгюз, ким геммеш,

ким а кьой, эчки сюрюп келе эди. Бир-
ле иерли, жюгенди атланы адеж тутуп,
бирле уа кьадырла бла сыра кьошун-
ла, жаулу-бишли ашарыкьла алып ке-
ле эдиле.

— Жол болсун! Къайры ахшы жол-
гъасыз? Тойгъамы барасыз? — дегенди
Ерюзмек алагъа.

— Угъай, биз тойгъа бармайбыз.
Амалыбыз алайды да, Къызыл Фукга
жасакъ алып барабыз,— деп, жарсыу-
ларын айтхандыла жолоучула.

— Багъалы нартла! Къызыл Фукга
жалынып не заманнга дер турлукъ-
буз?! Элтегиз жасакъ! Иерик туююл-
ме,— дегенни айтып, Ерюзмек, кылы-
чын сууруп, аланы алларын тыйып
тохтагъанды.

Жолоучула айтып, ангылатып кеп
кюрешгендиле. Алай Ерюзмек аланы
жолларына барыргъа кьоймагъанды.
Сора жасакъ алып келгенлени тамата-
лары былай дегенди:

— Ахшы улан, сен женгиллик этесе.
Бу ырысхыбызны башыбызгъа жара-
тыргъа суймегенден не да салыр жери-
биз болмагъандан алып келмейбиз.
Эрттеден жюрюй келген тѳрени сенми
кьойдураллыкъса? Жасакъ бермесек,
Къызыл Фук бизни жашаусуз этерикди.
Жолубузгъа барыргъа кьоймай эсенг,
бу келтирген затларыбызны да былай
кьоюп, ызыбызгъа кьайтабыз. Къызыл
Фук бизге чамланмасын. Кесинге алай
базына эсенг, санга чамлансын.

Жолоучула, Къызыл Фукга алып
келген жасакъларын да алайда кьоюп,
юйлерине кетгендиле. Ала кьоюп кет-
ген малланы, ырысхыны да батыр
Ерюзмек онгсузлагъа, къарыусузлагъа
юлешгенди.

Болгъан ишлени кына сакъаллы
Къызыл Фук иги билгенди, алай Ерюз-
мекке къатылмагъанды. Ол, эшта, анга
дертин жетдирирге амал излей, бир
аман акъыл эте тура болур эди.

*Басмагъа Сулейман Тѳппеев
хазырлагъанды.*



Сур. Е. Чеченованыды

«НЮРНЮ» ПОЧТАСЫ

Журналны январь айында чыккыган сѣзберге, биринчи болуп, тюз жууапла ийгенле: Хушто-Сыртдан — 4-чю классны окъуучусу Аккаева Маржан, Къашхатауну орта школуну окъуучулары Залиханова Залина бла Чеченов Эдик, Хабаздан — Ульбашев Юсуфдула.

«Багъалы редакция! Мен Яникойда жашайма, 1-чи классха жюриюме. «Нюр» журналны бек суююп окъуйма. Мен да сизге бир къауум элбер жибереме. Аланы манга ыннабыз айтып жаздыргъанды», — дейди Мизиева Аминат.

Къабыргъа узуну — къара кызы.

Акъ къалада — сары бийче.



сур. Х. Пшихачевидан

Хушто-Сыртдан 3-чю классны окъуучусу Гижгиев Амирбий жиберген элбер:

*Уугъа кюндюз чыккымайды,
Бир жаныуардан буккымайды,
Урса, атны жыгъады,
Тойса, жатып турады.*



Бу элберлени уа Аккаева Маржан ийгенди:

Таш тубюнде — кызыл ашыккъла.

*Къара ийнекни тубюнде — кызыл
бузоу.*



НАРАТ ТЕРЕК

Акъ къарчыкъла, ашыккымай,
ингирликде
Тюшедиле, жулдузлача, бийикден.
Нарат терек сюеледи жангызлай,
Шинжили бутаккыкыларын къар
сылай.

Тауушсузду, шум болгъанды тегерек,
Къар алгъанча битеу да жерни
башын.

Жалан да кеси сюеледи терек, —
Ол жангызлаймы этеди саггышын?

Ахматова Люба,
Былымны орта школуну окъуучусу.

СЕЗБЕР

(Жарашдыргъанна: Къашхатауну орта школуну окъуучулары Глашев Артур, Эбзеева Зарема, Батчаева Зульфия.)



Солдан онгнга: 1. Танг белги бергенде кычыргъан къанатлы. 2. Башы да, тамыры да ашаргъа жарагъан ханс. 3. Малкъарлы жазуучу А. Тёпеевни романы. 4. Таурухлада, жомакълада жүрюген сыфат. 5. М. Горький атлы Къырал саугъаны лауреаты, къабартылы поэт. 6. Социалист Урунууну Жигити (Совет райондан).

Башындан энишге: 1. Совет Союзну Жигити (таулу жаш). 2. Тиширыула омакълыкъгъа жүрютген зат. 3. Магъаданчылары шахары. 4. Милет кийим (кишиле киедиле). 5. Къабарты-Малкъарны бек улуу эллеринден бири.

„Нюрню“ 4-чю номеринде чыкыгъан „Сезберни“ жууапплятры:

Солдан онгнга: 1. КЪАЛАМ. 3. БЫХЫ. 4. УЛАКЪ. 7. БАЛТА. 8. ОЙМАКЪ. 10. ТУУАР. 11. АУАНА. 13. НАСЫП. 15. РОМАН. 17. ТЕРТ. 18. АСЫЛ. 19. ЫРГЪАКЪ.

Башындан энишге: 1. КЪЫЙМАТ. 2. МУРДОР. 3. БОТА. 5. КЪАРА. 6. МУКЪУЛАДИС. 7. БОРАН. 9. КЪАЗАН. 11. АПСАТЫ. 12. АРТМАКЪ. 14. АДЕТ. 16. АКЪЫЛ.

«НЮР» («СВЕТ») № 5

ЕЖЕМЕСЯЧНЫЙ
ДЕТСКИЙ ЖУРНАЛ
СОЮЗА ПИСАТЕЛЕЙ
КБАССР
И КАБАРДИНО-
БАЛКАРСКОГО
ОБКОМА ВЛКСМ

Выходит
с января 1982 года
На балкарском языке

Главный редактор
объединенной редакции
«СВЕТ»
П. КАЖАРОВ

Редактор журнала
«НЮР»
Э. ГУРТУЕВ

Редколлегия:

А. БЕГИЕВ
И. ГАДИЕВ
М. МОКАЕВ
А. СОЗАЕВ
А. ТЕППЕЕВ
М. ТИЛОВ
Х. ШАБАЕВ

Художественное
редактирование
и макет
М. ТАТРОКОВА

Рисунок на обложке
З. Шогеновой

Корректор
А. Додуева

Сдано в набор 26.01.88
Подписано к печати 02.03.88
Формат 60х90/8
Бумага офсетная № 1
Гарантия литературная
журнальная рубленая
Печать офсетная
Усл. печ. л. 2
Усл. кр.-отт. 6
Уч.-изд. л. 2,7
Тираж 2400 экз.
Заказ № 1633
Цена 15 к.
Индекс 73908

Адрес редакции:
360009, Нальчик,
пр. Ленина 5, Дом печати
Издательство «Эльбрус»
Нальчик,
ул. Адмирала Головако, 6
Полиграфкомбинат
им. Революции 1905 года
Госкомиздата КБАССР
Нальчик,
пр. Ленина, 33



суп. М. Мисаковичу